

愚

齋

存

稿

愚齋存彙卷第十一目錄

奏疏十一

南洋高等商務學堂移交商部接管摺

請獎南洋公學教員片

擬獎南洋公學洋教習片

中西各教習清單  
清單並附

洋教習

澤道鐵路議訂福公司合同摺

勘驗盧漢全路工程並黃河橋工摺

密陳整頓盧漢路辦法片

東事阽危密陳辦法摺

賞紫禁城騎馬謝恩摺

愚齋存彙

卷十一

奏疏目錄

一 愚補樓藏版

盧漢鐵路垂成續定小借款合同摺

推展吳淞軌道並萍醴鐵路工竣造銷摺

鐵路收支清單並附

愚齋存彙卷第十一

奏疏十一

南洋高等商務學堂移交商部接管摺

光緒三十一年二月

奏爲南洋高等商務學堂移交商部接管並歷年辦理大概情形恭摺具陳仰祈

聖鑒事

臣

於本月十三日承准駐滬商部左參議王

清穆函稱二月十一日奉本部電開南洋高等商務學堂歸併本部改辦高等實業學堂一摺已於本日具奏奉

旨依議欽此傳知欽遵並先期由商部電知王清穆就

近派員接收開學各在案仰見

聖明培育商材變通盡善之至意欽服莫名竊維自強  
首在儲才儲才必先興學臣前官津海關道時當講求  
學務尙未萌芽之先首創北洋大學堂以開風氣逮奉  
差上海卽建設南洋公學規畫伊始籌款維艱自光緒  
二十三年飭由輪船電報商局在餘利二成報効內撥  
款作爲創辦及常年經費規模漸次擴充其學級程度  
校舍等差一切創辦續辦情形迭經奏陳在案嗣值恭  
奉

明詔振興學務薄海聳聽承學嚮風自京師建立大學

堂後各行省學校如林各種科學逐漸賅備惟商業爲當務之急上海爲通商首埠顧名思義因地制宜況當列強商戰之秋自應預儲此項人材上備

朝廷任使遂於光緒二十九年八月

奏准改爲高等商務學堂遵照學務大臣奏定章程參酌東西洋實業各科由華洋各教習擬定現行課程認真講授堂中向設附屬高等小學堂以牖啟童蒙遞升中學另設譯書院東文學堂以研求西籍溝通譯才自臣丁憂之後船電兩局改歸北洋大臣管理經費驟減幸厯屆撥款撙節動用尙有贏存僅將譯書東文兩院

裁撤餘悉如舊至上院堂舍雖備因普通畢業猶未能  
按班足額延聘專門教習尤難籌款臣愚以爲一齊人  
傳不如置諸莊獄是以派遣出洋尤爲要著自開辦以  
來遴選津滬畢業諸生分赴東西各國游學各該生程  
度皆得直入彼都大學校肄習專門無須豫備其學科  
則注重工商實業以備學成回華任以路礦鐵廠銀行  
各要政漸可不借材異地授柄外人目前雖糜巨資將  
來可收實用現在留學諸生漸皆卒業其先已學成回  
國者或任京師大學堂教員或充北洋譯員或辦兩廣  
學務此外各省府縣學堂教員所在多有其在外留學

者亦皆操行端謹志趣嚮上毫無習氣均可造成有用之才計開辦已逾八年諸生畢業四次先後出洋者五十餘人似尙著有微效臣未嘗學問於教育門徑毫無心得深懼無以表率羣才今幸歸併商部直轄管理從茲聯屬一氣名實相符將來明定出身優予獎勵學者將益奮於功名之路以期効用於

國家斯實

微臣

興學育才之初心而尤

聖明扶植羣材振興實業之德意也除將學堂辦事章程教習學生銜名歷年收支款目各冊籍咨呈商部查照接收以資結束而昭核實外所有南洋高等商務學



堂移交商部接管並歷年辦理大概情形謹繕摺具陳  
伏乞

皇太后

皇上聖鑒謹

奏 三月初七日奉

硃批知道了欽此

請獎南洋公學教員片

光緒三十一年二月

再臣於光緒二十四年四月二十四日

奏陳南洋公學開辦情形卽經聲明各教習不乏體用兼賅之選職在課徒調取不及施教至勞榮途轉隘擬請將此項教習援照新疆設立俄文館章程暨同文館學生大考前列章程三年期滿由臣擇教誨有方造就最廣者分別保獎一摺五月十九日奉

硃批該衙門知道單併發欽此欽遵在案查公學創辦之初原派候選知府何嗣焜總理學務勤勤最深積勞身故已由臣奏奉

俞旨宣付史館立傳在案繼其任者如現任江西南昌府知府刑部郎中沈曾植吏部主事勞乃宣翰林院編修汪鳳藻安徽試用道劉樹屏湖南試用道張鶴齡均經臣先後聘充該學堂總理但爲時甚暫或回京供職或到省服官旋即辭去惟同知銜直隸候補知縣張美翊受事稍久成勞較多表率有方諸生翕服去年上海革命自由諸黨紛紛煽惑公學近在咫尺該令尤能約束生徒不爲所誘其心地誠篤學識淵深實不僅爲時務通才至歷年招延教習不下數十人內如中學教習布衣張天爵等西學教習候選直隸州知州陳伯涵等

附屬高等小學堂教習舉人陳懋治等大半屆滿八年  
次亦五六年類皆盡心教育始終一致核其年限固已  
倍於原奏而於學務大臣奏定新章五年給獎期限亦  
復相符該學堂程度較高聲聞較著溯自督率開辦以  
來幸無貽誤者實賴羣策羣力之效不無微勞足錄惟  
該公學總理張美翊教習張天爵二員淡於榮利均聲  
稱不敢仰邀獎敘可否懇求

聖明傳

旨嘉獎以爲勵志講學者勸其餘中西學科教習各員  
合無仰乞

天恩准予分別獎敘出自

鴻施逾格除咨商部吏部兵部學務大臣外謹繕具擬  
獎南洋公學教習各員清單附片具陳伏乞

聖鑒訓示謹

奏 三月初七日奉

硃批該部議奏單併發欽此

請獎南洋公學洋教習片

光緒三十一年二月

再南洋公學向延洋教習三員美國博士辭來西係教  
理財商律公法私法專科美國學士勒芬邇係教商業  
歷史地理專科美國進士樂提摩係教英法文學專科  
均能恪遵章程分科講習生徒悅服眾論翕然南洋公  
學之名傳播東西洋游學諸生皆得直入各國專門學  
校亦賴該洋員等盡心教授不懈益虔實屬卓著成效  
查辭來西合同已於去年六月期滿業經蟬聯續訂勒  
芬邇樂提摩等合同亦於本年六月期滿臣雖交卸學  
務未便沒其微勞合無仰懇

天恩俯准查照外務部釐定寶星章程

賞給該洋員等三等第一寶星以資激勸而示優異除咨外務部商部暨學務大臣外謹繕具擬獎清單附片具陳伏乞

聖鑒訓示謹

奏 三月初七日奉

硃批該部議奏單併發欽此

謹將擬獎南洋公學中西各科教習人員繕具清單恭  
呈

御覽

計開

知縣用教諭舉人程一鶴擬請免選教諭以知縣選用  
附生趙玉森沈慶鴻林祖潛均擬請以訓導選用  
候選直隸州知州陳伯涵擬請俟選缺後以知府用  
儘先補用守備馮琦擬請俟補缺後以都司用  
同知職銜監生胡貽穀擬請以縣丞選用  
採選知縣舉人陳懋治擬請以知縣儘先選用



謹將擬獎南洋公學洋教習各員繕具清單恭呈  
御覽

計開

美國博士薛來西擬請

賞給三等第一寶星

美國學士勒芬邇擬請

賞給三等第一寶星

美國進士樂提摩擬請

賞給三等第一寶星

澤道鐵路議訂福公司合同摺

光緒三十一年三月  
豫撫陳晉撫張會後銜

奏爲澤道鐵路遵

旨妥籌與福公司擬訂條款取益防損經部派員覆與  
磋議就緒恭摺具陳仰祈

聖鑒事竊查光緒二十四年六月英實使向總理衙門  
堅索英商承造鐵路五條以證和好其末條渾言山西  
河南至長江經王大臣照覆應俟福公司晉豫開辦礦  
工再與妥商該使覆稱原訂礦務合同本准修築鐵路  
由礦山運送礦產至河口此河口卽在襄陽可以通達  
長江是爲澤襄鐵路初議之緣起二十五年英實使又

以勘查襄陽至漢口水道不能通暢商請改道澤州鐵路欲在河南懷慶府與盧漢銜接渡河後折入安徽正陽關以達江蘇江浦縣之浦口改名懷浦鐵路時有御史張荀鶴條奏鐵路改道辦法亦以由懷至浦爲便總理衙門覆奏謂遠跨豫皖名爲緯路實已斜亘南北隱然增一幹路殊屬窒礙難行請

旨飭

臣

妥籌辦理二十八年拳匪事定英使在外務部

重申前議福公司代理人哲美森來滬述其駐使之意堅請商辦臣以盧漢應還本息擔任甚重設穿裂幹路斜行至浦則長江下游客貨勢必攬奪淨盡盧漢無以

自養爭執數十次哲美森知不可奪願在懷慶銜接後  
多走榦路從許州鄆城縣另造一路向南仍至浦口告  
以英使所爭五路中已有信陽至浦口一路爲英商怡  
和匯豐銀公司承辦旣願至鄆相接不如仍循榦路而  
東由信陽直至浦口福公司與銀公司同是英商當可  
合辦詎英使仍堅執商議懷浦鐵路或使中國任借洋  
款數百萬鎊或由彼自造奪我權利將來轉運兩省礦  
產彼可自便實係專顧英商之利益不顧華債之艱鉅  
外務部與臣往返電商總以有礙盧漢力持不允逮二  
十九年五月英使重向外務部聲請將已定之澤道鐵

路由福公司代爲借款仿照正太鐵路章程辦理卽在  
衛輝府與盧漢幹路接聯臣初猶堅執原合同福公司  
應自備款項造路不應請中國借款收路山西撫臣張  
曾敷悉心籌計有不可許者八端派道員志森赴滬協  
商冀同駁阻河南撫臣陳夔龍乘道口至清化將次告  
成派道員韓國鈞與訂行車章程禁止攬轍礦產以外  
之貨物悉未就範在英使總以澤州至襄陽鐵路先經  
允准今既不允其另闢一路直至長江已屬萬分爲難  
向部饒舌並以耽延過久迭次函部電滬催訂合同臣  
思山西商務局旣誤給礦利於前鐵路總公司復代擔

路債於後卒之路成礦成皆屬英商之利福公司且以  
晉礦合同標題載明開礦製鐵以及轉運各色礦產字  
樣執定欲在鐵路合同載明准其運鐵意在就礦設爐  
製鐵運售此意尤惡夫環球各國類以煤鐵之豐歉卜  
國勢之強弱中國官商協力現以機爐煉鐵者祇漢陽  
一廠然大冶鐵砂不及山西之富厚一與接通榦路卽  
照條約禁止內地設廠而就礦開爐製鐵轉運生鐵以  
及分運鐵石煤焦運往江海商埠煅煉爭銷皆足損礙  
中國鐵政較正太之僅許修路者情形不同且澤道經  
行之處俱係瘠區貨客稀少工築艱鉅必致養修之外

不數本息乃將以上利病與哲美森痛切指駁彼既因礦而及路我卽就路以制礦羈輓之法議就原訂之孟平澤潞四屬內所有鐵礦暨煉鐵合用之煤並煉焦爐統由中國合股開辦仍由

國家自設鎔化廠凡各礦所出鐵砂均須官廠冶煉成鐵方准由火車裝運並聲明所指各處煤礦如亦願意合辦由山西商務局與福公司再行商議挽晉省已失之利防鐵路溢運之權內外協力前後爭持已及三載實已無可再爭此澤道鐵路合同未議條目以前先與修改礦章之曲折情形也查福公司道口至清化鎮九

十英里有奇爲已成之路借款收回給價多少應派員核實估工以爲斷清化至澤州三十八英里爲未造之路應俟礦務開辦實有把握另再續訂合同不應於此時預售借票多擔本息故名謂澤道鐵路合同實則現議借款祇敷收回道口至清化爲止半年以來派華工程司候選知府詹天佑赴豫查帳勘工一一確實飭令齋冊赴京由外務部加派左參議臣雷補同邀同哲美森按照滬議節略逐款磋商就緒咨行臣奏明辦理伏查現議借款合同二十一款又行車合同十款議借英金七十萬鎊五釐行息九扣交付實得英金六十三萬



磅約合華銀五百萬兩左右

國家作保鐵路作抵除福公司已用工費並息銀磅虧查照帳冊應於售票項下撥還六十一萬四千六百磅將道口至清化鐵路收回歸併外餘贖之款儘數留備行車經費此項借票簽字後第十年起分二十年贖還代辦行車期內餘利提給二成合同期滿歸總公司自行管理用人行政督辦大臣有准駁稽核之權機件材料先儘中國工廠承辦福公司無論明暗不得讓售別國人民亦不得假手別國之人辦理該路事務設有違犯總公司有權另招他公司接辦福公司亦不得索償

此外條款悉係參酌正太鐵路合同辦法另訂擬設山西鎔化廠並合辦礦務合同與此約同時定議一併簽押礦路兼顧之中實寓權利並收之意合將現議合同分別繕具清單恭呈

御覽俟奉

旨批准由部咨行到

臣

再行會同簽押所有詳訂澤道

鐵路合同並預防流弊緣由是否有當謹會同河南巡

撫

臣

陳夔龍山西巡撫

臣

張曾敫合詞恭摺具陳伏乞

皇太后

皇上聖鑒訓示謹

奏 本月十九日奉

旨依議欽此

勘驗盧漢全路工程並黃河橋工摺

光緒三十一年五月

奏爲盧漢鐵路南北兩幹告成並黃河橋工將次完竣  
勘驗大概情形繪圖恭摺具陳仰祈

聖鑒事

臣

於四月十九日荷蒙

召見面奉

諭旨垂詢盧漢鐵路工程及黃河橋工情形至周且悉  
仰見

聖明慎重路政洞燭無遺欽服下忱莫可言喻伏查盧  
漢鐵路工程自保定府起係於光緒二十四年南北兩  
岸分段並舉二十六年北方拳亂工作暫停修復燬失

致延時日迭飭比國總工程司沙多趕速築造既不得  
草率以從事亦不准濡滯以誤工本年三月據報北榦  
自

京師抵黃河北岸南榦自漢口抵黃河南岸均已通車  
惟中間黃河橋梁費鉅工艱卽西國大興築家亦視爲  
特別工作經臣歷派德美意法比各國著名工程司錫  
樂巴李治海沙地道理懷及沙多等先後履勘往復推  
求始擇定兩岸橋址南起滎澤縣屬廣武山麓北起武  
陟縣屬姚期營下游爲河流向未漫溢之處詢謀僉同  
並經沙多與各工程司詳諮酌度定議用螺絲鋼柱造

法橋身其長九百九十餘丈橋門凡一百有二南北寬而中間稍窄非僅不佔水道且可藉暢河流其鋼柱長七丈餘從河底深入沙土中約三丈至四五丈不等橋南岸有廣武山之固根腳較牢北岸地勢坦平似無鈴東因於沁河下流建築石壩二十五里以資保障現據該工程司稟報全橋工程約於本年九月底告竣其時伏秋兩汛已過察看橋柱河流兩無妨礙卽當開車行駛從此南北幹路二千四百餘里一氣貫通土貨出產日多商旅輻輳出於其塗自必較前暢旺臣於四月初三日由漢口登車逐段驗工軌道堅平大小橋梁三百

八十六座亦均穩固而武勝關廣武山兩處巖洞皆鑿至深長一百丈內外施功尤鉅綜計全路工程計惟黃河橋工及各段擬設廠棧應添車輛並修補各項工程因工繁款絀尙未一律告竣現正督飭總辦各員悉照總核算處洋文原帳詳細造報並候商部派員赴總核算處嚴切稽查以昭核實茲將分別繪就盧漢鐵路全圖黃河橋工全圖各一冊恭呈

御覽除咨外務部商部直隸督

臣

湖廣督

臣

河南撫

臣

查核外所有

微臣

勘驗盧漢全路工程暨黃河橋工大

概各情形理合恭摺具陳伏乞

皇太后

皇上聖鑒訓示謹

奏 本日奉

旨該部知道欽此



密陳整頓盧漢鐵路辦法片

光緒三十一年五月

再盧漢鐵路整頓辦法

臣

與商部及督

臣

袁世凱籌商

應分三端一曰工程已限令總工程司沙多儘本年十月內全工告竣屆時應

奏請

欽派大臣驗收全工一面截清全帳分別奏咨聽候商部嚴切查核二曰行車從前南北兩岸短路陸續裝貨搭客係屬試辦去年爲止除開支養費並購存行車材料外實得餘利銀二百三十七萬五千餘兩已撥入工程帳內列收湊用橋成以後全路通行自應會訂詳細

章程凡合同所未詳者妥速釐定以垂久遠三曰收贖  
查合同第一款載明借款法金一百十二兆五十萬佛  
郎克第三款載明自一千九百九年起分三十年照表  
拔還第五款載明在一千九百七年以後中國總公司  
無論何時可將借款還清一經全還所有合同卽時作  
廢等語大約工竣之後經理得宜所收貨客餘利自必  
日增月盛分作二十年拔還諒可有盈無絀但本項未  
經全還之日借款公司勢不能不按照行車合同代爲  
調度經理多用洋人多糜薪費並須於實在餘利中酌  
提十分之二酬給比公司誠未免利權外溢

臣與部

督臣密切面商路工用項除部款賠款行車餘利毋庸  
歸還外借款照現在金價核計統其不過銀三千數百  
萬兩莫如按照合同第五款於三四年後全數歸還卽  
將合同作廢此後行車進款由數百萬以至千萬絲毫  
可無外散其尤要者有事之秋他人不能干預此係  
京畿直達長江一大幹路創造之初良有深意存焉不  
僅在生利已也故收贖以早爲貴如進口洋貨加稅各  
國悉照英美商約允加一倍半則數千萬可以立致無  
待他求倘或加稅未能速成似亦不難另行設法就令  
借債還債暫以別項作保仍歸路利分還較之從前路

未造成空手借款迥不相同而一轉移閒外人可無代理之權餘利悉歸我有造路資本十餘年閒即可收回所有二千四百餘里之幹路以及枝路機器廠等皆爲國家自有之物業利莫大焉臣過津鄂與袁世凱張之洞再四商榷均深以爲然擬請

密飭外務部商部戶部直隸督

臣

湖廣督

臣

預爲籌畫

以期早有成算但提前全還雖係合同內所列之條然揆情度理恐非比公司所樂聞事前似宜暫弗宣播以免阻撓是否有當謹附片密陳伏乞

聖鑒訓示謹

奏 本日奉

旨該部知道欽此

東事貼危密陳辦法摺

光緒三十一年五月

奏爲東事貼危密陳大概恭摺仰祈

聖鑒事竊

臣

於四月十九日荷蒙

召見垂詢日俄戰後情形伏見

朝廷宵旰焦勞芻蕘必採欽悚莫名念自日俄戰起

臣

在上海時常接見歐美人員議論頗有關係曾於上年

正月二十一日會同督

臣

魏光燾岑春煊等密陳一摺

奉

旨留中近日聞知兩國議和開辦在卽窺察日本國民  
之意果有更變宗旨欲謀接替俄國所佔三省一切權

利而更加堅牢全局所關事機極迫過此以往無策保全但事機固不可坐誤應變亦不可倉黃應由樞部密速妥籌調齊從前舊案揆度目下情勢立定將來方鍼然後分別布置層次仍不外牽制辦法愚昧所及謹爲我

皇太后

皇上詳晰陳之

一調查從前舊卷約有五案 丁酉年俄國代造東三省鐵路合同及派員設局總辦將來如何收回此應查者一 戊戌年俄國暫租旅順大連灣條款是何年限

旅順是兵埠大連灣是商埠條款內有無分別此應查者二 辛丑年俄國訂分三期歸還三省地方條款第一限如期歸還有無別項牽涉此應查者三 癸卯年俄國第二期愆期不還爭論至何地步爲止此應查者四 日本國開戰通行照會無涉及三省之事此應查者五

以上五案皆爲此次籌議根據如不先在根據之中討取線索誠恐措詞隔膜應由外務部分別鈔錄三分之一送軍機處一送政務處以備朝夕查閱一暫存以備使臣帶往外國



一揆度目下情勢約有十慮 日俄議約必欲兩國直接不欲他國干預此可慮者一 日本所佔之戰地係俄國愆期未還中國之地彼可稱得之於俄非得之於中國專與俄國逕議不必先問中國此可慮者二 日本流血糜餉所佔之地即使仗義來歸豈能無所要素使我無力酬勞而攘我權利謂我無兵防禦而代我保守振振有詞此可慮者三 甲午之戰遼東本已允讓日本嗣爲俄法德代我索回各得酬謝日本至今引以爲恥今又入彼手中亦恐有詞可藉此可慮者四 旅順大連灣彼已兩次苦戰而得彼雖有對馬島可守而

旅順決不肯還必將謂中國無海軍倘旋得復失於彼  
有害且已佔卽還亦損彼體面陽爲拒俄陰實扼我此  
可慮者五 遼東一帶已接造日本鐵路倘俄將三省  
路權讓日以抵兵費中國徒擁虛名永無收回之日並  
於地權一切有礙此可慮者六 日本宣戰勅諭有言  
維持遠東永久平和之局不礙他國權利利益之政策  
等語從來誓師詔誥無不慷慨仗義及至戰勝論勢不  
論理此可慮者七 日本議院所擬要求俄約諸事內  
稱佔領東清鐵路又稱俄三省所得利權悉歸日本等  
語將來日政府必曰海部兵部上下議院立意如此日

皇雖仗信義難違兵民之意此可慮者八 兩戰國直  
接議和我爲地主默無一言各國局外斷難干預若俄  
因兵費難償竟將佔我未還之地權及路權舉以讓歸  
日本一面列入和約一面要挾中國續立專約屆時再  
與爭拒噬臍無及此可慮者九 三省權利若果爲一  
國所佔各國失維均之勢必將羣起效尤如德先佔膠  
澳英俄法各佔威海旅大廣州灣故事各自爲謀吾何  
能抗此可慮者十

以上十慮人人意中皆有惟中國閒於齊楚當於玉帛  
往來之際刻刻存冰淵兢惕之心目前兵力財力均不

及人外交之道專仗筆舌與人折衝已屬下策然彼則利在直接我則利在牽制不得不在此中討一線生活萬難因循萬難游移大局安危實繫於此

一立定將來方鍼約有三端 三省鐵路華俄銀行合同正其名曰大清鐵路可見此係商路俄本認歸中國自主此後若仍由俄國專辦日本必不從若改由日本專辦他國亦不願若由中國借一國之債歸一國代辦亦嫌偏重祇有兩種辦法一歸中國借公債一歸各國集公股查蘇彝士河爲歐洲通亞之海道現爲各國公司三省鐵路亦爲歐洲通亞之陸道似亦不妨各國公

管專立公共公司分售股票或借款小票各國俱派董事限定若干年歸還中國如年限未滿若干年後亦准給價收回自管而俄國即可獲路價以償日本似尙得情理之平此當籌者一 三省俄國立限應還之地卽爲兩國爭戰之地戰事完後自應全還中國去年日美新立商約載明中國應允將盛京省之奉天府安東縣大東溝開埠通商訂定外國人公其居住合宜地界等語可見該省通商日美皆認中國主權將來應再增添多處爲水陸通商處所妥議公其章程各國利益同需而日本爲各國通商之領袖礦廠各利益應可另外多

給以酬其勞如問我能否自守則當毅然決然應曰合東三省北洋練兵十萬以資自守毫無疑義此當籌者二 旅順係爲俄國暫租今既不守應銷舊約如日本願意接租可允與照訂租約期滿歸還或期未滿而中國兵力足以自守亦可隨時歸還要在不比俄約再有加增至大連灣則應爲通商口岸與奉省擬開各埠一律歸我自主此當籌者三

以上三端宜於日俄議和之時使各國知此大概竊料各國當無不以爲然卽戰勝之國亦不能明斥其非蓋他端固非中立之國所應干預惟三省戰地吾之地也

三省鐵路吾其主也凡屬應有主權豈能置之不問但當度德量力勿爲太甚大約擬定方鍼與其權利讓一國獨佔必致妨礙自主不若利益讓各國公其可以永保自主且使俄不能別求償補各國亦不能再有效尤一密擬聲明層次辦法約有六事 美國洋貨售銷三省爲大宗自願保我主權留彼商利日俄開戰之初美政府曾以保全中國土地之權布告各國此次介紹議和雖不能彰明干預如中國立定主見託其轉達是戰局以外之事當無推諉似應密與柔克義切商此應辦者一 各國意見英日最相契合此外亦願公需利益

保我主權似應先向各使探其政府意旨並將中國自  
定方鍼切實明告使其轉達政府發爲公論樂與相助  
此應辦者二 庚子年事頗得力於國電藉收互相牽  
制之效此次仍不能不用牽制之法以破其直接之害  
先探美國及諸國意旨約計日俄派使一有起程確信  
應可卽辦國電並照會預爲兩戰國聲明併爲有約之  
諸國聲明其命意措詞須簡要動聽又須無礙兩戰國  
面子此應辦者三 外國辦事最善閒中布子故日本  
開戰前後皆有人借題前赴各邦聯絡偵探今華盛頓  
旣爲會議之地自應及早遣使前往但目前未便明派



似可借題派人趕緊赴美密授機宜相時運動再俟  
後命屆時如可商議則中國已有人在不致臨時有不  
及之虞此應辦者四 諸國於三省事皆屬關心當有  
公論似應分電各駐使屬令密探各政府論說宗旨隨  
時電知樞部以廣耳目而資應付此應辦者五 目下  
豫謀收回以前辦法必當格外慎密該國外交手段敏  
捷事事先發制人深恐文電傳播報紙沸揚涉及政府  
萬一先來詰問事更棘手應由軍機處密令內外各衙  
門隨時親手封固不得稍有洩漏此應辦者六  
以上六事未能賅括無遺惟距兩國會議日期已促倘

疑難慎重深恐開罪於人將來必致愼無可愼難上加  
難仍必齟齬而後已外人每謂中國辦交涉向來只有  
應著從無先著實皆愼重二字貽之戚也此時若僅照  
會諸國誠難免戰國藉口謂我何不先商於彼而欲求  
助於人故不如照會戰國卽以照會戰國之文通行諸  
國並卽以照會各使之意兼發國電名正言順似無所  
慮假使我今日一語不發彼將來強我所難豈終能隱  
忍到底聽人所爲哉微臣一知半解明知無裨大局受  
恩深重值茲時事阽危不敢不直抒所見以備

採擇理合恭摺詳晰密陳伏乞

皇太后

皇上聖鑒訓示謹

奏 本月二十六日奉

旨留中欽此

賞紫禁城騎馬謝

恩摺

光緒三十一年六月

奏爲叩謝

天恩仰祈

聖鑒事本月二十五日內閣奉

上諭尙書銜前工部侍郎盛宣懷著加恩在紫禁城內

騎馬欽此竊

臣

夙官卿貳未報涓埃愧馬齒之徒增喜

龍光之近接茲復仰蒙

恩遇異數有加攬轡澄清壯志漸銷於鞅掌據鞍顧盼

暮年渥荷夫

優容聞

命自

天負慚無地

臣

惟有驚庸力策鼇戴時殷從前奔走風

塵堪策識途之薄效此後騰驤

雲路敢忘叱馭之初心以冀仰酬

高厚鴻慈於萬一所有

微臣

感激榮幸下忱理合恭摺

叩謝

天恩伏乞

皇太后

皇上聖鑒謹

奏 本月二十六日奉

硃批知道了欽此

盧漢全路垂成續訂小借款合同摺

光緒三十一年七月  
直督袁鄂督

張會奏

奏爲盧漢幹路剋期全竣不敷尾款擬照工程司單開  
數目分別准駁續發小票以竟全工恭摺具陳仰祈  
聖鑒事竊照盧漢鐵路比國借款合同訂明法金一百  
十二兆五十萬佛郎克虛數九扣實得法金一百一兆  
二十五萬佛郎克比國總工程司沙多末次原估全路  
工款黃河橋工並未成路以前就本付息拳亂平靖修  
復軌道推展枝路共需法金一百六十六兆六百六萬  
八百十五佛郎克比較借款實得之數舉成數而言不

敷法金六十六兆合同未言加售小票榦路關繫南北  
樞機勢難半途停輟其時和議大綱賠款四百五十兆  
之數已定臣宣懷探知比法曾以拳匪毀路併案索償  
因面諭沙多並派道員柯鴻年密商比法公使將因鐵  
路所得之賠款撥充工用該公使先多阻難嗣迫於公  
義而又慮賠款係分年攤還工款一起需用化散爲整  
籌墊損虧商權數四議由總公司簽函擔保始允比法  
兩國各半籌墊總數其法金五十兆七十一萬七千佛  
耶克繁難曲折幸底於成然較沙多所估不敷之數實  
尙短缺法金十五兆之譜曾將詳細情形由臣宣懷咨



明外務部商部暨臣世凱臣之洞分行備案本年南北鋪軌均已及河黃河橋工亦將次落成限令趕緊結束以憑專摺

奏報旋據該工司開單請核前來臣等公同查核計開全路行車遵限在本年十月全路完工遵限在本年十二月統計應用款目如員薪地價土方隄工黃河鋼橋又車站機廠貨倉鋼軌零件枕木石子油煤雜料又汽車客車貨車暨餐宿郵政各車又岔道枝軌暨推設要站處所又估計不及意外需用之款又按照合同應備榦枝各路行車周轉之款又借款全數應付未付之息

或計工待撥或年久修換或推廣展築或應辦未辦內  
分條目十二項需法金二千六百四十萬九千佛郎克  
除現存各項尾款又約估本年底止行車進款法金一  
千一百七十四萬三千佛郎克可撥抵用外計不敷法  
金一千四百六十六萬六千佛郎克再除完工後推廣  
車站修換枕木車輛法金三百六十萬佛郎克係預備  
之款應歸第二起籌借外加以臨城枝路法金四十萬  
佛郎克計需法金一千一百四十六萬六千佛郎克按  
九扣應借票面法金一千二百七十萬佛郎克是爲第  
一起急籌之款其全路完工後三年內推廣南端沿江

車站及枕木車輛一律換新計法金三百六十萬佛郎  
克又易州磁州兩枝路計法金三百五十萬佛郎克計  
需法金七百十萬佛郎克按九扣應借票面法金八百  
萬佛郎克是爲第二起預籌之款並據聲明第一起急  
款不定完工勢必耽遲付息尤無著落開單呈請速籌  
各等語臣等查自京城至漢口幹路枝路工鉅費重爲  
中國向未經辦之事加以黃河大橋及武勝廣武兩山  
開鑿其艱難尤爲各路所未有庚子年中更拳亂修復  
燬路資遣洋員耗費不少而延擱工程虛糜歲月多出  
利息其數更鉅原定借款本不敷用尙幸收回賠款以

意外所得之資補意外所用之費現在剋期全路通車諸待結束所少不過尾數按照合同必應中國自籌復查合同第一款訂明總公司原有資本一千三百萬兩嗣緣財政日絀末批部款三百餘萬迄未領撥設比公司懸工待款照約糾本司農仰屋無以籌付且本年八月應付息款尤急不能待比法使均赴外務部詰問催促臣宣懷在京當與外務部商部再四會商擬就沙多原稟分別准駁除完工後應用添改推廣各項飭令歸入總公司應得行車餘利項下開支外其所請籌備完工及本年息款所估法金十二兆七十萬佛郎克改爲

准借法金十二兆五十萬佛郎克九扣交付仍照原合同辦理與原議應撥部款之數不相上下如此則全工指日結束本年息款亦可照付毋庸再請官本統而計之此次工項除索回比法賠款收轉銀行回息及未完工以前試辦行車餘利歸入工程皆屬因路所生之款不應作本外實用比公司大借款一百十二兆五十萬佛郎克又續借小款十二兆五十萬佛郎克九扣兩共實收一百十二兆五十萬佛郎克就本付息明年三月爲止約三十四兆佛郎克實計借款爲工程所用者不及八十兆佛郎克約以三佛郎三合銀一兩不及銀二

千四百萬兩又盧保動用部款五百六十二萬餘兩共計造成鐵路二千五百三十里尙屬合算但因中途停擱年久息多爲可惜也茲將續議全路完工借款合同底稿先與外務部商部妥細酌定恭呈

御覽仍俟奉

旨批准再行畫押所有盧漢全路垂成尾款無著續籌小借款分別准駁俾竟全工緣由謹合詞恭摺具陳伏乞

皇太后

皇上聖鑒訓示再此摺係

臣

宣懷主稿合併陳明謹

奏 本月十三日奉

硃批外務部知道單併發欽此

推展吳淞軌道並萍醴鐵路工竣造銷摺

光緒三十一年七月江

督周鄂督張蘇撫陸爾撫胡護湘撫龐會後銜

奏爲鐵路總公司推展吳淞軌道並建造萍醴鐵路工竣收支官款列作第三起接續造銷繕具清單恭摺仰祈

聖鑒事竊

臣

於光緒二十八年九月奏報動用官款建

造淞滬鐵路收支經費截至二十七年十二月止分繕單冊列作總公司第二起銷案摺內曾聲明預備推展蘊藻浜北至吳淞礮臺灣止一切架橋過河接展軌道所用經費自應另案附銷以清起訖經外務部核准覆



奏奉

旨依議欽此又光緒二十四年三月臣與湖廣督臣張

之洞會奏漢陽鐵廠商辦情形派員開辦萍鄉煤礦濟  
益鎔鍊該處運道艱阻請築造萍鄉鐵路展至長沙以  
利轉輸各情欽奉

諭旨照准並蒙

飭下江西湖南各撫臣一體照料均先後欽遵有案以

上兩路概係動用盧漢鐵路所撥之官款吳淞展路工  
竣後業照英商銀公司借款合同第二十三款於上年  
九月初一日收還工價歸併滬甯一律管理萍鄉展路

因經費不足改至湘潭縣屬之洙州水口爲止是爲萍  
潭鐵路逐節籌款逐節釐修本年冬閒工可全竣其萍  
鄉至醴陵一節先已通車卽應併案造銷藉清款目經  
臣檄飭承辦工員會同總公司造冊處委員接續第二  
起銷案分造四柱收支總細各冊詳候覆核奏咨去後  
茲據各該員開單齎冊呈請核奏前來臣詳加覆核前  
案淞滬造銷工程係至蘊藻浜南岸爲止自建橋過浜  
以通吳淞礮臺灣築路鋪軌補發地價又附路應設分  
機岔道共積長五華里有半車站道房橋梁涵洞一切  
具備又前報淞滬養路經費係至光緒二十七年十二

月止現自二十八年正月起到三十年九月歸併滬甯之日止員司工匠站長道夫按月應給薪費煤炭材料馬路駁岸等項隨時支給修費均應接續前案作正開銷其上屆奏銷以後行車所進腳價歸併滬甯之前照約收還工價另列收款項下以備核總此截清淞滬鐵路之大概情形也至萍潭鐵路自萍鄉煤礦之安源地方起經萍鄉縣峽山口老關迤邐至湖南醴陵縣陽三石止鋪設軌路連同分機岔道共積長華里一百四里有奇湘贛錯壤山嶺崎嶇沅澧分流汊港遶闊內造鋼橋木橋三十四座圓拱橋三十四座涵洞水溝二百七

十七處所鑿山地居百分之六分此外車站道房轉盤水櫃材料廠火車頭以及搭客運煤各種車輛購地填土各種經費悉由承辦之員及洋工程司隨時核實樽節動用仍由臣逐批派員覆核明確方准在總公司撥款內支給此另案建造萍醴鐵路之大概情形也綜計上屆奏銷舊管項下結存庫平銀二百九十九萬四千七百五十四兩一錢五釐新收項下湖一撥款淞滬車腳連同銀公司撥還淞滬造價其庫平銀一百九萬四千一百九十一兩九錢八分七釐六毫管收兩項實合庫平銀四百八萬八千九百四十六兩九分二釐六

毫開除項下淤滙一冊購地展路並養修經費附銷鐵路學堂等二項實支庫平銀二十三萬九千五百七十六兩六錢八分六釐六毫萍醴一冊購地造路造車經費實支庫平銀一百四十八萬九千二百五十四兩三錢七分一釐四毫二共合支庫平銀一百七十二萬八千八百三十一兩五分八釐餘存二百三十六萬一百十五兩三分四釐六毫內先經奏准預支漢廠軌價藉杜洋軌漏卮計存庫平銀一百二十萬四千六十一兩四錢七釐八毫又湖南巡撫在解款內扣支粵漢勘路彈壓各經費及總公司派洋員赴粵勘地赴美川費停

工後開發各項經費計墊支庫平銀五萬七千六百三十一兩八分八釐應俟粵漢鐵路歸結辦理方能索還歸墊其餘接續支應醴陵迤下至湘潭縣洙州鐵路工程款應俟全路辦結另案造銷以上收支各款均經商部派員在滬調查合符前數先行開列清單奏報在案至萍醴開車後逐月收進運煤腳價隨時支出養修經費並安源鑛山依煤線之遠近添設各項枝路統俟下次銷案彙核造報據總辦淞滬鐵路道員陳善言總辦萍潭鐵路道員薛鴻年等詳請奏咨前來謹照前案繕具清單恭呈

御覽仰懇

天恩飭下外務部商部戶部查核准銷所有總公司推  
展吳淞軌道並建造萍醴鐵路工竣作爲第三起造銷  
緣由除咨部外謹會同署兩江總督臣周馥湖廣總督  
臣張之洞江蘇巡撫臣陸元鼎江西巡撫臣胡廷幹護  
理湖南巡撫臣龐鴻書恭摺具陳伏乞

皇太后

皇上聖鑒訓示謹

奏 本月二十一日奉

硃批該部知道單併發欽此

謹將鐵路總公司推展淞滬軌道以及養路附銷等項  
並建造萍醴鐵路工程收支經費開具簡明清單恭呈  
御覽

計開

舊管

一存盧保淞滬兩案報銷所餘官款經費庫平銀二百  
九十九萬四千七百五十四兩一錢五釐

新收

淞滬冊內

一收湖南省劃撥昭信股票庫平銀一萬兩



一收淞滬鐵路光緒二十八年正月初一日起至三十年八月底歸併滬甯鐵路之日止所收車腳進款角洋合庫平銀十七萬一千七百八十三兩二錢二分八釐五毫

萍醴冊內

一收滬甯鐵路借款內撥還歸併淞滬路造費規銀一百萬兩合庫平銀九十一萬二千四百八兩七錢五分九釐一毫

以上管收兩共庫平銀四百八萬八千九百四十六兩九分二釐六毫

開除

淞滬冊內

一支補領地價項下計一款動支經費庫平銀七千六十九兩三分三釐八毫

一支展造路工項下計十六款動支經費庫平銀六萬九千九百三十七兩九錢三分三釐

一支養路歲修項下計二十三款動支經費庫平銀十三萬七千三百八十三兩二錢一分五釐三毫

一支附銷鐵路學堂等項下計二款動支經費庫平銀二萬五千一百八十六兩五錢四釐五毫

以上淤漚冊內共計四十二款動支庫平銀二十三萬九千五百七十六兩六錢八分六釐六毫

萍醴冊內

一支購地項下計一款動支經費庫平銀十二萬四千九百六十九兩四錢九釐八毫

一支造路項下計三十九款動支庫平銀一百十萬七千八百六十一兩四錢二分六釐九毫

一支造車項下計三款動支庫平銀二十五萬六千四百二十三兩五錢三分四釐七毫

以上萍醴冊內共計四十三款動支庫平銀一百四十

八萬九千二百五十四兩三錢七分一釐四毫

兩其統計動支庫平銀一百七十二萬八千八百三十一兩五分八釐

實在

一實存庫平銀二百三十六萬一百十五兩三分四釐  
六毫內有漢陽鐵廠預支軌價庫平銀一百二十萬四千六十一兩四錢七釐八毫又湖南巡撫在解款內扣  
支粵漢勘路彈壓等費及總公司墊支洋員赴粵購地  
赴美川資停工後開發各項經費庫平銀五萬七千六  
百三十一兩八分八釐其餘接續支應醴陵至湘潭之

涿州鐵路工款應俟全路辦結另案造銷合併聲明